

'ի վերայ Գանձակեցի Յովհաննէս վարդապետի, որ յառաջագոյն 'ի փախստեան իւրում 'ի Պարսկաստան, ըմբռնեցաւ 'ի ճանապարհի և եղաւ 'ի բանտի, և բարձեալ 'ի նմանէ պատիւ Պատրիարքութեան Կոստանդինուպօլսոյ: Բայց Երուսաղէմայն մնացեալ 'ի վերայ նորա, չարչարեաց զաղքատս, և դատապարտեաց զնոսա 'ի տուժս և 'ի տուգանս եւ ըստ ցանկութեան սրտի իւրոյ՝ եկեր եւ վատնեաց զինչս և զստացուածս եկեղեցեաց և վանօրէից, որոյ վասն դատապարտեցաւ նա 'ի պատիժ պատուհասի:

Իմացեալ զայսոսիկ Արքայի, հրամայեաց բաժանել ըզ-Պատրիարքութիւնն Երուսաղէմի 'ի Կոստանդինուպօլսոյ և մի եւս համարձակիլ ումեք միաւորել զայն: Յովհաննէս վարդապետ կացեալ անդ յԱդրիանուպօլիս, էսա զերկուս հրովարտակս. զմին վասն իւրոյ Պատրիարքութեան 1174 (1717), և զմիւսն վասն Պատրիարքութեան Գրիգորի վարդապետի 'ի վերայ Երուսաղէմի 1176 (1718), և դարձաւ 'ի Կոստանդինուպօլիս:

Բայց զհրովարտակն Պատրիարքութեան Երուսաղէմի, որ մինչեւ ցայն վայր փոփոխեալ և այլայլեալ էին Տեղակալք 'ի շփոթութեան իւրեանց, ետ յղկել և նորոգել և գրեթէ վերստին ձուլել զայն. գրեալ 'ի նմա ուրոյն ուրոյն իշխանութիւն Պատրիարքին, և բովանդակ իրաւունք և սեփհականութիւնք ազգին, ըստ մտաց առաջին հրովարտակաց. և այս գործ տեւեաց բովանդակ ամ մի և ամիսս ութ: Եւ 'ի դարձին իւրում 'ի Կոստանդինուպօլիս, արար ժողով մեծ յեկեղեցւոյ Ս. Ստուածածնի, եւ ետ գրել նոցա թուղթ ազաչանաց յէջմիածին առ Ստուածատուր Կաթողիկոս Համաստանցի, զի հրամանաւ իւրով ստիպեցէ զԳրիգոր եպիսկոպոս, զառաջնորդն Ս. Կարապետի գալ 'ի Կոստանդինուպօլիս վասն Պատրիարքութեան Երուսաղէմի, քանզի կասկածէին՝ թէ նա ոչ առնու յանձն գալ անդր. գրեցին առ նա և ինքեանք եւ ազաչեցին, զի մի յապաղեցցէ գալ, եւ առաքեցին զարս երեւելիս հրաւիրել զնա:

Հաճեալ յոյժ ընդ այս Կաթողիկոսին, գրեաց առ Գրիգոր եպիսկոպոս, եւ հարկեցուցիչ հրամանաւ բռնադատեաց զնա յանձն առնուլ զայն իշխանութիւն յօգուտ ազ-